

20
21

ISLA ((•)) ONLINE

Diaranson 24 November 2021

Email: IslaOnline@gobierno.aw Tel: 528-4952

NOTICIA DI GOBIERNO

20
21

Gabinete Wever - Croes II





CORTEJO FUNEBRE DI EX MINISTER DI HUSTICIA SEÑOR HYACINTO RUDOLFO 'RUDY' CROES A PASA DILANTI DI BESTUURSKANTOOR

Diaranson mainta 24 di november e cortejo funebre ex Minister di Husticia señor Hyacinto Rudolfo 'Rudy' Croes a pasa dilanti di Bestuurskantoor. Prome Minister y demas Ministernan di Gabinete Wever – Croes tabata presente pa ricibi e ultimo bishita na Bestuurskantoor di señor Rudy Croes. Gobierno a entrega un krans den nomber di Gobierno y pueblo di Aruba.

Cu hopi tristesa, tur esnan presente a brinda sosten na casa y yiunan di Señor Rudy y a tuma despedida di sr. Rudy Croes, naci dia 5 di september 1946 y a fayece 20 di november 2021.

Señor Rudy lo wordo recorda pa semper pa tur locual cu el a haci pa nos dushi pais Aruba lagando atras un legado di fe y determinacion, lucha y optimismo. Señor Rudy tawata un co-fundador di partido MEP, Parlamentario, Minister y a fungi den diferente area manera cultural y deporte a traves di diferente proyecto grandi na biniestar di Aruba. Señor Rudy Croes ta un gran baluarte di nos pais. Aruba a perde un gran yiu di tera.

Gobierno di Aruba ta expresa palabranan di forsa na henter famia y tur ser keri. Cu Rudy Croes sosega na paz.



Prome Minister a asisti na e evento annual di ATIA "Survived Covid, Aruba's Great Pivot"

REFORSANDO E RESILIENCIA ECONOMICO DI ARUBA, TA FUNDAMENTAL PA ARUBA SU RECUPERACION DI COVID-19



Diabierna ultimo a tuma luga e evento annual di ATIA "Survived Covid, Aruba's Great Pivot". Prome Minister Evelyn Wever-Croes a hiba palabra den e evento enfatisando cu reforsando e resiliencia economico di Aruba, ta fundamental pa na recuperacion.

Prome Minister a duna di conoce cu e anochi tawata sumamente ameno y informativo. "Pa mi loke mi ta hiba di awe ta e ambiente, animo, cooperacion y colaboracion pa traha hunto pa Aruba desde cu Covid-19 a bati na nos porta."

Como un parti sumamente interesante di e evento, tawata tin un panel di comerciante cu a trece padilanti con Covid-19 a afecta nan y na mes momento con nan a transforma e crisis den un oportunidad. Ohala e storianan aki por inspira hopi mas comerciante y persona nan na Aruba.

Den e di dos panel Prome Minister y Minister Geoffrey Wever a elabora riba e vision di Gobierno y con pa hiba Aruba padilanti.

Prome Minister a duna di conoce cu el a ricibi diferente feedback indicando cu e puntonan treci ta muestra hopi cla cu Gobierno tin un vision pa recupera y hiba Aruba padilanti.

"Gobierno su mision y vision ta pa recuperacion di Aruba pa asina trece progreso y bienestar pa tur hende. Den e lineanan aki tur ministerio ta aline. Ministerio Economico ta aline riba recuperacion economico, Ministerio di Enseñansa ta aline riba e recuperacion door di prepara nos hobennan pa e periodo di recuperacion y tur otro ministerio ta dirigi riba recuperacion di nos pais den tur sentido", Prome Minister a remarca.

Un pregunta al caso cu a wordo dirigi ta tocante e 12.6 % di recorte y kico lo pasa si bin un walk out masal y kico Gobierno lo haci pa evita esey? Prome Minister a splica cu e 12.6% ta un condicion di Hulanda pa Aruba haya sosten di likides. Manera Aruba ta para awor, nos mester 6 luna mas di sosten di likides di Hulanda. Januari te cu july ta proyecta cu aruba lo depende di esaki.

Continuacion **REFORSANDO E RESILIENCIA ECONOMICO....**

Aruba a haya di Hulanda caba 900 miyon y ta calcula cu nos mester ainda 200 – 300 miyon pa nos cera e total di fianza na 1.2 miyon. Aruba ta depende di nan y Aruba mester cumpli cu e condicionnan. Den e siguiente lunanan Gobierno mester negocia ainda con ta bay paga bek bou di interesnan mas faborabel.

“Dus por tin walk out pero e no ta den man di Gobierno. Nos a pidi caba permiso pa stop di corta completo y solamente corta mita otro aña y nos ta pendiente decision di Hulanda. Nos tin dialogo constante cu sindicatonan pa evita cu cosnan menos bon pasa na Aruba.

Mi ta respeta sindicatonan, mi ta riba mesun liña cu nan y lo kier debolbe tur hende nan placa bek pero nos ta depende di Hulanda y mester cumpli cu e condicionnan un tempo ainda. Ban keda frankil, warda Hulanda contesta nos y despues nos ta wak unda nos ta para”.

Den e evento di ATIA, Prome Minister a enfatisa:

“Nos a sobrevivi Covid-19, e pio crisis cu Aruba a conoce den e siglo aki. E pio crisis economico pa Aruba despues di ciere di LAGO. Pero nos a sobrevivi. Mi tawata sa cu lidera un pueblo lo no ta facil. Mi tawata cu lidera un pueblo den un crisis, lo no ta facil. Pero nunca mi a pensa mi lo biba den un evento di e magnitud aki mucho menos lidera durante esaki. 20 luna despues, ainda e ta parce ireal.

Gabinete Wever-Croes, mesora a lora manga y traha mas



duro ainda determina pa recupera. Reforsando e resiliencia economico di Aruba, ta fundamental pa na recuperacion. Pa recupera completamente, nos mester brasa manera nobo di pensa. E motto ‘business as usual’ ya no ta aplicabel. Nos mester enfoca riba crea empleonan nobo.

Gobierno, hunto cu partners a diseña su strategia di recuperacion, ‘Repositioning Our Sails Master Plan’ no solamente pa provee un impulso temporal, sino pa pone e fundeshi pa crecimiento economico a largo plazo. Un crecimiento economico inteligente, inclusivo y sostenibel, cu ta enfoca riba reformanan structura pa conberti den economia resiliente”.



Prome Minister Evelyn Wever-Croes: Mientras cu Gobierno a actua rapido pa haya sosten di likides **HULANDA A PONE RECORTE DI 12,6% COMO CONDICION**



Den e ultimo dianan aki, un topico cu ta den discusion e dianan aki bou di sindicatonan, ta e recorte di salario di 12,6%. Prome Minister Evelyn Wever-Croes, reaccionando riba esaki, ta remarca cu talves ta bon pa recorda con tur cos a cuminsa.

Mesora cu Covid a bati na nos porta na maart aña pasa y Aruba a pidi Hulanda pa sosten di likides, Hulanda a pone condicion cu mester recorta salarionan di empleadonan. Aruba a propone dia 30 di april 2020 un recorte di 12,6% te cu 31 di december 2020, pero unilateralmente Hulanda a cambia esaki dia 18 mei 2021, den 'tot nader order'.

No solamente esey, sino Hulanda a pone esaki como condicion na sosten di likides, estilo 'take it or leave it', pues si Aruba no acepta, no tin sosten di likides.

Na fin di 2020 Hulanda a recorda Aruba cu e recorte mester sigui den 2021 'tot nader order'. Secretario di Estado Knops a bolbe ripiti cu tanten cu Aruba ta depende di sosten di likides di Hulanda, e recorte mester keda na vigor.

Pa 2022, segun tur calculacion, Aruba ta bay tin mester ainda di sosten di likides, pa 6 luna, total pa como 300 miyon florin. Luna pasa, 22 di october, Aruba a pidi Hulanda, ya cu pa 2022 lo mester di sosten di likides solamente pa 6 luna, pa mitar di aña, pa baha e recorte di salario di empleadonan tambe na mita. Pues pa den 2022 no corta 12.6%, pero solamente 6.3%.

Siman pasa, dia 16 nov Hulanda a informa Aruba cu a pidi conseho di CAFT cu lo keda cla prome cu 30 di november 2021. Gobierno ta den espera di contesta. "Pues, e no ta den man di Gobierno di Aruba, e ta den man di Gobierno Hulandes awor", Prome Minister a enfatisa.

Prome Minister a asegura: "Gobierno di Aruba ta para na e banda di sindicatonan, nos kier mescos cu sindicatonan. Mi deseo mas grandi ta di elimina e recorte pa tur hende haya nan salario completo.

Pero den esaki Hulanda tabata duidelijk: tanten nan tin cu duna nos placa tur luna, nan ta pidi pa empleadonan di sector publico y semi publico sigui entrega parti di nan salario. Nos a reuni cu sindicatonan dos biaha e luna aki caba y ambos reunion a bay bon. Den e ultimo reunion mi a pidi pa no pone na riesgo e recuperacion di nos pais. Pasobra sino, nos ta mas leu for di cas.

Den medionan di comunicacion mi por a destila cu sindicatonan ta pidi pa por negocia cu Hulanda. Ami ta sostene e iniciativa aki, pero mi ta realistico, no tin espacio pa negocia. Ta mescos cu ora bo cera un hypotheek cu un banco y bo haya bo obliga pa bay di acuerdo cu e condicionnan, despues bo no ta bay bek y re-negocia condicionnan. Nos a purba y 'as we speak' ta purbando, peor ainda no tin reaccion positivo di Hulanda.

Pero atrobe, si ta esey sindicatonan kier, ami ta sostene, pasobra atrobe mi ta bisa, nos ta para na e mesun banda cu sindicatonan. Nan mester djis pidi esey.

Mi kier ripiti cu mi ta compronde e posicion di sindicatonan, mi ta respeta e trabou di sindicato, y mi tin hopi aprecio pa e trahadonan, mienbronan di sindicato. Nos ta para na banda di sindicatonan. Nos kier mesun cos cu sindicatonan kier, y mi deseo mas ferviente ta pa por elimina e recorte di salario, pa cada trahado bay cas cu nan salaio completo.

Pa nos logra esaki, Aruba mester sigui e rumbo di recuperacion, y den esaki Aruba tin mester di nos tur. Di Gobierno, di sindicatonan, di Parlamento, di empleadonan y di sector comercial. Nos lo sigui na mesa di dialogo cu sindicatonan y tur gremio pa logra e recuperacion di nos pais.

Prome Minister Evelyn Wever-Croes:

MIKE EMAN AWE PARA NA BANDA KIER INSTIGA

Mientras cu na momento di crisis el a bandona timon di su mesun gobierno y a bay sinta bao di un palo y a bay riba welga di hamber

Prome Minister Evelyn Wever-Croes ta reacciona riba distractionnan peligroso di parti di AVP cu ta purba stroba Aruba su progreso y recuperacion. Mike Eman awe para na banda kier instiga, mientras cu na momento di crisis el a bandona timon di su mesun gobierno y a bay sinta bou di un palo y a bay riba welga di hamber. Awo señor Eman, den media ta instigando y kier trece duda den maneho di nos Gobierno na e momentonan crucial aki di recuperacion di Aruba su economia cu ta unico oportunidad cu nos tin pa bolbe na normalidad.

Pa cuminsa, Prome Minister a splica, CAFT a wordo causa pa e mal maneho di Mike Eman y su gobierno di AVP. Na inicio di e prome gobierno di señor Eman, el a cuminsa na bisa cu ta bay elimina BBO, pero kite pa pone kico na su luga? El a lage na mita. Despues su mesun colega e tempo ey Minter di Finanzas señor Mike de Meza a coregi'e y a bis'e cu no por. E manipulacion irresponsabel aki a causa un caida di entrada pa pais Aruba. Y nan tabata sa con devastador esaki tabata pa Ariba, pero nan no a worry.

Despues a dicidi pa manda nos expertonan fiscal financiero cas y a institui un 'management team' cu a bira cara otro banda y laga fiesta wordo haci cu placa di pagado di impuesto. Malgastando placa di comunidad na tur sorto di conferencia y biahamento, cu permiso di e Minsitrer di finanzas e tempo ey señor de Meza.

Despues AVP a pone Juan David Irausquin cu a hereda tur loke Mike Eman y su Gobierno a crea na gasto, debe y problema. El a cuminsa kita hende for di trabao, na un di e departamentonan mas critico di Aruba, a manda casi tur trahado social cas. A subi edad di pensioen etc, etc. Despues AVP a manda Juan David na careda Hulanda y Hulanda no kier a sinta cu n'e.

"Puntra bo mes dicon Hulanda no kier a sinta cu Juan David. Puntra bo mes dicon. Esaki ta contestanan cu Mike Eman mester duna pueblo. Pasobra su maneho a atacha credibilidad di henter nos pais cu Hulanda. Ora cu bo mes no tabata por mas cu locual bo a causa, bo a bay sinta bao di un palo pariba di Fort Zoutman y a bay riba un wega di hamber, esey tabata bo contesta pa Hulanda, despues di bo añanan di gobernacion".

Asina Aruba a haya Caft. Y Awe Aruba tin CAFT riba nos lomba, causa pa Mike Eman su gobernacion. Ora ya no por a sigui fia mas y e debe di Aruba a redobla, bao presion di Hulanda el a pone un experto financiero, Sr. Angel Bermudes, pero el a mara su manan pa e no por tuma decision y e mes a sigui biahando rond mundo saca potret.

UnMinister di Finanzas experto sinta como decoracion pa

Hulanda mira, pero Hulanda kier a mira accion despues di a crea tanto debe pa nos pais.

Ayera y awe por a mira Mike Eman den medionan ta saca comunicado y insitiga nos comunidad y kier trece duda den maneho di Gobierno actual.

"Nos si no a pone un Ministrer di Finanzas pa decoracion. Nos a pone un señora fuerte cu a goberna segun berdad, no segun fantasia of miedo. Nos a para e fiesta y a bay over na baha gasto. Nos si a reduci cantidad di personal di ministeriornan. Nos a introduci reformanan fiscal cu a reparti e peso financiero den mas sector y a hasta compensa e trahadonan cu reduccion di inkomsten y loon belasting.

Nos si a gana respet di Hulanda, no cu show pero cu maneho di calidad y concreto. Nos si a logra un presupuesto cu surplus y logra elogio di Raymond Knops y Gobierno Hulandes sin a kita hende na cantidad di Gobierno.

Awe despues di e Crisis di Pandemia y Economico di mas grandi cu a dal henter mundo den e ultimo 50 añanan, bo kier para na banda y instiga y tira gasoline? Foei Mike, Foei.

Gabinete Wever Croes si ta compronde, nos si ta scucha di expertonan di nos y di otro instancianan internacional. Bo no por fia bo progreso, bo mester sanea prome bo situacion, pa asina crea confiansa, despues estabilidad pa despues genera progreso cu bo maneho.

Bo no por fia progreso, e ora lo bo ta bibando riba vloer di papel riba un pos sin fondo.

Bo no por haci esey cu un pais. P'esey negoshinan cu Mike Eman a maneha a kibra.

Y ta p'esey Hulanda a perde confiansa den Mike y no kier a topa cu su ministeman.

Awe nos ta saliendo for di e pandemia y e crisis di mas grandi cu a yega di golpear nos pais. Mike Eman mester tin un poco pasenshi, laga e Gobierno cu a gana e confiansa bek di pueblo di Aruba y di Hulanda caba e trabao. No hinca palo den e spaak di wiel awor.

Nos no ta cla ainda, pero cada dia cu nos sigui sostene e maneho actual cu ya ta dunando fruto, nos ta mas cerca. Uni Gobierno y Pueblo cu solidaridad, nos lo logra", Prome Minister di nos Pais Aruba, señora Evelyn Wever-Croes a termina bisando.



Conferencia 35 aña Status Aparte - Aruba Ta Di Nos Tur STATUS APARTE A BRINDA NOS UN PAIS, TA KEDA NA NOS PA CONSTRUI PATRIA

Oranjestad - Diamars ultimo Minister Maduro di Cultura hunto cu Minister President Evelyn Wever-Croes tabata anfitrión di e 'Conferencia 35 aña Status Aparte, Aruba ta di nos tur', dedica pa conmemora e 35 aña di Aruba como Pais autonomo denter di Reino Hulandes. Tabata un mainta yena cu e historia di e Status Aparte di nos Pais y su protagonistanan. Un mainta na unda cu grandi y hoben por medio di entrevista a haya oportunidad pa expresa nan opinion riba Aruba su Status Aparte y con nan ta wak Aruba den futuro. Panelistanan consistiendo di profesionalnan di Aruba a duna un bista di con nan a experencia nos Status Aparte, con nan ta wak cu Aruba a desaroya den 35 aña di tempo y con nos Pais lo mester sigui desaroya e siguiente añanan nos dilanti. E 'Conferencia 35 aña Status Aparte, Aruba ta di nos tur', tabata yena di e creatividad di nos hendenan. Por medio di un visualisacion a conta e historia di Status Aparte y e desaroyo di Aruba den 35 aña. Tambe tabatin declamacion di e poema 'Union E yabi' door di sra. Melendy Bisslik - Neuman, ganadora di Poeta di Patria 2018 y 2019.

Alabes tabatin presentacion di un obra teatral 'Curason- Aruba ta di nos tur' cu actuacion di sr. Jhon Freddy Montoya y sra.

Joan Danies, acompaña pa musiconan sr. Johnny Scharbaay y sr. Chencho Kelly como aporte di Departamento di Cultura.

Durante e Conferencia aki tambe a presenta dos panel

'Posicion di Aruba den Reino' lidera pa moderador sra. Indra Zaandam cu panelistanan sra. Lily Marval, sr. Aldrich Croes, sr. Tristan Every, sr. Rendell de Kort, sr. Edric Croes y sr. Hubert Dirks. Durante e panel e panelistanan a comparti nan opinion riba varios tereno kico Status Aparte a nifica pa Pais Aruba y tambe con nan ta mira Aruba su futuro den Reino.

E conferencia a clausura cu e interpretacion di e cantica 'Mi Pais' di nos artista Jossy Brokke hunto cu Edjean Semeleer, acompaña pa e guitarista Chris Kross. Un bunita cancion pa recorda nos riba e stimacion cu nos mester tin den nos curason pa nos Pais. Status Aparte a brinda nos un Pais, ma ta keda na nos pa construi Patria. Minister di Finansa y Cultura ta yama danki na tur e panelistanan, na e personanan cu a comparti nan opinion tocante Status Aparte den e grabacion, sra. Clarita Britten, e hoben Jaylon Machado, High Performance, TeleAruba, Diario TV, Canal 22, Radio Power FM y tur otro medionan social, pa nan tremendo cooperacion.

Alabes Minister Maduro ta gradici tur hende cu a acepta e invitacion pa tabata parti di e conferencia

den un ambiente positivo y cu e mensahe principal di union na bienestar di Aruba.





SUSTAINABLE DEVELOPMENT GOALS



SESSIONNAN CU STAKEHOLDERS PA RAPORTE DI METANAN MUNDIAL PA UN DESAROYO SOSTENIBEL

Gobierno di Aruba a compromete su mes pa implementa Agenda 2030 y e Metanan Mundial Pa Desaroyo Sostenibel (Sustainable Development Goals - SDGs) di Nacionnan Uni (UN) na Aruba.

E Agenda 2030 y e SDGs ta forma un marco global di accion pa yega na mas prosperidad pa nos planeta y pa henter humanidad. Nos mundo ta cambiando rapidamente door di cambio di clima, pandemia y hopi otro aspecto cu ta influencia mundo manera nos a bin ta conoce.

Pa logra tin un miho futuro, ta importante pa henter comunidad uni forza y tuma accion pa crea esaki. SDG ta fungi como un compas y guia den esaki.

Na 2022 Aruba como parti di Reino lo raporta na e Voluntary National Review (VNR) di UN tocante e progreso di e implementacion di e SDGs na Aruba. E Comision Nacional di SDGs ta encarga cu e raportahe.

Hopi organisacionnan, impresanan y individuonan caba ta


tumando accion cu ta aporta pa yega na e metanan aki. P'esey den e proceso di VNR tambe nos ta colaborando cu diferente stakeholders pa acumula bon practicanan y otro informacion relevante tocante e practicanan sostenibel y contribucion na e implementacion di SDGs na Aruba.

Alavez e proceso di VNR ta brinda e oportunidad pa por intercambia di idea y siña di otro con pa incorpora practicanan sostenibel den comercio, organisacionan y na nivel personal.

Cu e meta aki, Prome Minister a invita sector priva, NGOs y demas instancia pa participa na un sesion virtual consultativo cu lo tuma luga diana 30 di November y 1 di December 2021 di 9or di mainta pa 12or di merdia.


A wordo pidi pa yena tambe un cuestionario tocante stapnan sostenibel awo of den futuro, bon practicanan of storlanan exitoso y/of obstaculonan den implementacion di SDGs.

Prome Minister di Aruba ta spera di por conta cu presencia di invitadonan na e sesion aki.



MINISTER Danguí Oduber

Turismo y Salud Pública



Diversificando nos turismo SARPA AIRLINES LO BAY CUMINSA CU VUELONAN DIRECTO DESDE BARRANQUILLA Y MEDELLIN


Diaranson atardi Minister di Turismo Sr. Danguí Oduber tabata na Aruba Airport Authority (AAA) pa haci anuncio oficial cu Sarpa Airlines lo bay cuminsa cu vuelonan pa Aruba desde Colombia. E noticia aki ta uno sumamente positivo pa Aruba su turismo caminda lo bay diversifica e mercado Colombiano cu 2 ruta nobo. Di manera aki Aruba ta sigui reconstrui e mercado importante aki creando mas conectividad entre Aruba y Colombia.

Sarpa Airlines ta existi pa mas di 40 aña, pero ta recién awor cu nan lo bay cuminsa duna servicio di vuelonan comercial. Den pasado nan tabata duna servicionan di vuelo charter y tambe di air ambulance. E aerolínea ta habnendo diferente ruta nobo den Caribe incluyendo na Corsou, pero Aruba ta e unico isla cu ta bay ricibi 2 vuelo semanal for di Barranquilla y Medellín. E vuelo inaugural lo bay tuma lugar dia 2 di januari 2022. Fuera di e 2 rutanan menciona Sarpa Airlines ta trahando duro pa logra habri un ruta directo for di e ciudad di Cali tambe Sarpa Airlines lo bay ofrece e servicio di 2 vuelo semanal

directo pa Aruba for di Barranquilla y Medellín riba diaranson y diadomingo. E aerolínea lo ta uzando e tipo di avion jet Embraer 145LR cu tin un capacidad di 50 stul. E rutanan di Barranquilla y Medellín ta rutanan cu den pasado ya caba a yega di wordo uza, pero pa diferente factornan nan no a resulta exitoso. Sarpa Airlines ta di opinion cu como nan avion ta di 50 stul e lo ta ideal pa e ruta nan aki ta un éxito e biaha aki. Sarpa tin proyecta pa trece alrededor di 15.000 turista den aña 2022 pa Aruba. Minister Oduber ta sigui diversifica nos turismo y cu e vuelonan nobo aki ta percurando pa ehecuta e vision di diversificacion.

Minister Danguí Oduber a yama un danki na e CEO di Sarpa Airlines Sr. Carlos Mesa y tambe na e propietario di e aerolínea Sr. José Roberto Luna pa duna Aruba e confianza. Tambe e mandatario a manda palabra di elogio pa ekipo di AAA y ATA cu ta trahando duro pa Aruba keda diversifica nos mercadonan den Latino America.





MINISTER Rocco Tjon

Husticia y Asuntunan Social



AWE NOS A DESPEDI DI HYACINTHO RUDOLFO "RUDY" CROES; "E HOMBR'I PUEBLO"



ORANJESTAD - Diaranson merdia a tene acto di entiero di Ex-Mandatario, Yiu, Ruman, Tata, Amigo, Colega; "E Hombr'i Pueblo", Sr. Hyacintho Rudolfo "Rudy" Croes. Minister di Husticia y Asuntunan Social Sr. Rocco Tjon, a hiba palabra durante e ceremonia pa asina conmemora y gradici Sr. Rudy Croes (QEPD), pa su bunita trayectona den e mundo politico, pero tambe como un gran amigo.

Cu un tristeza profundo pero enormemente agradecido na e

famia completo di Sr. Rudy Croes, Minister Tjon, a hiba palabra pa asina comparti cu esnan presente su propio experiencia y conocimiento den feliz memoria di Sr. Rudy Croes. Minister Tjon a expresa cu Sr. Rudy Croes tawata un Arubiano humilde pero orguyoso di su origen, y cu como politico a haya e nomber "E Hombr'i Pueblo".

Sr. Rudy Croes a kere fiel cu cada hoben y adulto na Aruba tin e derecho fundamental pa conoce e historia di su pais

Continuacion AWE NOS A DESPEDI DI HYACINTHO RUDOLFO "RUDY" CROES....



E historia di e norma y balornan di su nacion y su simbolonan di identidad, cu ta identifica nos como pais. Y pa e motibo aki Sr. Rudy Croes a profundisa su mes den bukinan y literatura di hendenan cu a relata e realidad di nos historia. Tur esaki pasobra e tawata kere firme cu mester brinda "respet pa e berdad".

Remarkabel pa e Mandatario ta, cu na prome instante Sr. Rudy Croes no tawata tin ningun deseo pa drenta e arena politico, como tal, na aña 1986 ora e a wordo aserca pa subi lista di partido Movimiento Electoral di Pueblo e a vocifera: "Mi sa den kico Betico a pasa exactamente y awor den e tristeza aki, mi no ta ni pensa riba drenta den politica". Sinembargo, a logra convence pa toch subi lista y den su prome salida, cual tawata e eleccion di dia 6 di januari 1989, a logra saca un total di 4707 voto. Asombroso ta cu, apesar di a logra e cantidad di voto aki, e a nenga pa bira Ministro, pa motibo cu e kier a bay Parlamento prome pa asina e por gana experiencia. Esaki ta loke cu ta caracteris'e, un bes mas, como e Arubiano humilde cu Sr. Rudy Croes tawata.

Den su trayectoria como Minister di Husticia, Sr. Rudy Croes a logra hopi pa pais Aruba, entre otro; implementacion di GuardaCosta, "Mas Blauw Riba Caya", Centro di Husticia na Santa Cruz y un warda completo na Noord, vigilancia aereo a traves di helicopter, y vigilancia a traves di radaman. Pero tambe, a mira e importancia y e necesidad pa informacion y

inteligencia den investigacionnan, y pa e motibo aki a introduci y inverti den sistemanan tecnologico manera "Radex". Un sistema cu te dia di awe nos ta usa. Asina por menciona hopi mas cos cu Sr. Rudy Croes a haci pa Aruba.

Minister Tjon, a comparti un poco di su experiencia personal cu Sr. Rudy Croes, cual a inicia na aña 2004, como un hoben profesional cu a sigui e curso di team di aresto a peticion di ex Mandatario Sr. Rudy Croes. A siña conoce Sr. Rudy Croes mas di serca durante momentonan oficial, y momentonan inoficial, for di yamadanan, "whatsappnan", combersacionanan na Sr. Rudy Croes su cas y a pasa momentonan ameno na Uratoca. E ultimo combersacion cu e ex-Mandatario, apesar di su propio luchanan di salud, tawata riba bienestar di Aruba. Sr. Rudy Croes semper tawata enfatisa e lucha cu a wordo hiba di nos tur como pais Aruba, y tawata suplica nos pa conserva esaki. Un muestra di su amor pa nos tur, su amor pa Aruba.

Minister Tjon a termina su discurso cu un dicho di nos libertador "Sr. Betico Croes". E dicho cu "Mo Rudy", a incorpora y finalisa su buki cune, titula "E Hombr'i Pueblo". "Mi sa cu despues cu nos no t'ey mas, historia lo demostra kico ta e rikesa inmaterial cu nos a laga atras pa nos criaturanan". Por ultimo, e Mandatario a expresa cu "Mo Rudy por ta trunkil cu su sacrificionan no tawata envano. Familiares y su amigonana tambe por ta trunkil, cu boso sacrificio no tawata envano. Rudy lo keda recorda pa semper, y su lucha lo continua, cu Mo Rudy sosega na paz".



Gabinete Wever - Croes II

ARUBA MESTER DI NOS TUR PA RECUPERA.

Departamento di Salud Publico: UPDATE 24 DI NOVEMBER 2021

Segun resumen di awe 23 persona a recupera y un total di 16 caso nobo di COVID-19 a keda registra di cual 6 ta no-residente. E cifranan aki ta representa un 'Positivity rate' bou di nos residentenan di 8%.

E cantidad di casonan activo di COVID-19 pa awe ta 176 y cantidad di fayecidonan relaciona cu COVID-19 ta 173. Datos ta ilustra casonan nobo di COVID cu un average semanal di

16 caso pa dia y un averahe di 'positivity rate' semanal di 11% pa dia.

Actualmente na Aruba tin 9 persona interna debi na COVID di cual den ICU tin 3 persona y riba piso general tin 6. Na Colombia tin actualmente 8 persona den ICU y 3 riba piso general.

24/11/2021	TOTAL	RESIDENTE	NO-RESIDENTE
Casonan Nobo	16	10	6
Activo	176	137	39
Recupera	15897	14388	1509
Positivo	16246	14695	1551
Morto	173	170	3
Vacuna	83513	-	-
Hospitalisa AUA	9	-	-
ICU AUA COL	11 3 8	-	-



HABITONAN PA KEDA
Saludabel
DEN TEMPO DI COVID-19 Y VACUNACION





Drumi suficiente y determina bo orario!

Cuida bo oranan di soño. Drumi bon ta beneficioso pa bo salud. Purba tin un orario regular pa drumi anochi y lanta mainta. Muchanan mester drumi entre 10 pa 14 ora pa asina mehora e caracter, e memoria, e creatividad y regula nan organismo positivamente. Un adulto mester drumi minimo 7 ora pa anochi, pa asina su sistema completo por traha optimal. Pa combati COVID-19 bo mester mantene bo salud y vacuna, ya cu ta com-proba cu e vacuna tin un efectividad halto pa proteha bo y evita transmision. Ban uza tur e hermentnan cu nos tin pa caba cu e virus aki na nos isla!

Ami SI ta vacuna!



Mantene 1.5M minimo di distancia




Laba man frecuentemente



Uza tapa boca paden di tur luga

VACUNA!



Un Feliz Dia

ISLA ONLINE

NOTICIA DI GOBIERNO